

IKERGAZTE: NAZIOARTEKO IKERKUNTZA EUSKARAZ.

Donostia, 2023ko maiatzaren 17tik 19ra

IKERTZAILE EUSKALDUNEN BOSGARREN KONGRESUA

www.ueu.eus/ikergazte

ARTIKULU-ESKAERA

Ikertzaile hori,

UEUren eta Kongresuaren Batzorde Zientifikoaren izenean atsegin handiz gonbidatu nahi zaitugu IkerGazte2023 kongresuan parte hartzera.

Asko gara ikerkuntzan dihardugunok eta asko gara eguneroko lan hori euskaraz egiten dugunok. Hemen, puntako ikerkuntza egiten dugu eta alor guztietan egiten dugu, bai giza-zientzietan, gizarte-zientzietan, zientzia zehatzetan, teknologia eta arkitekturan, edota osasun zientzietan. Urteak daramatzagu UEUn arlokako profesional eta ikertzaileen bilkurak antolatzen, eta 2015ean jauzi garrantzitsua egin eta arlo guztietako ikertzaile euskaldunentzako bilgunea izan zen IkerGazte kongresuko lehen edizioa antolatu genuen. UEUren izaera bateratzailea eta integratzaileari zein UEUk euskararekiko duen konpromisoari eutsirik Donostian ospatuko den **IkerGazte2023rako, ikertzaile euskaldunen bosgarren kongresurako deia** luzatzen dizugu. Azken urteotan izan den ikertzaile gazte euskaldunen kopuruaren hazkundera ikusita, haiek bildu eta egiten duten lanari ikusgarritasun handiagoa ematea da kongresuaren xede nagusia. Gazte diogunean ibilbide zientifikoaz ari gara: tesia bukatzen ari zaren horri edo azken lauzpabost urteotan amaitu duzun horri zuzenduta dago kongresua.

Kongresuari hasiera emateko nazioartean ibilbide sendoa duten hizlariak izango ditugu. Saio zientifikoetan, jasotzen diren lanen artean hautatuko diren eta arlo guztiak ordezkatzeko dituzten lanen aurkezpenak izango ditugu, bai ahozkoak eta bai poster formatukoak. Parte-hartzaileok Euskal Herrian egiten den goi-mailako ikerkuntzaren gaineko ikuspegia izango dugu. Kongresuan parte hartuko dugun ikertzaileen arteko harremanak egiteko / finkatzeko... lagungarriak izango diren mahai inguru eta mintegi interesgarriak ere izango dira. Eta egitarau formalaren osagarri, Donostiako eragile kultural eta herrikoiekin saio osagarriak ere izango ditugu.

Beraz, ikerkuntza proiektu baten emaitzak ezagutarazi nahi dituzula? Erdu! Tesia bukatzeaz edo bukatu berri duzula eta zure emaitzen berri eman nahi duzula? Zatoz zu ere! Nazioarte mailako ikerkuntzaren berri euskaraz! Ez ezazu aukera gal!

Hautatzen diren artikuluak ISBNdun argitalpen digital batean agertuko dira; horretaz gain, jakintza arlo bakoitzeko artikulu bana sarituko da eta Euskal Herriko hainbat argitaletxerekiko lankidetzan zenbait lanen bertsio hedatuak argitaratzeko aukera ere egongo da.

LANEN BIDALKETA

Atsegin handiz gonbidatzen zaitugu zure lanak IkerGazte2023 kongresura bidaltzera. Euskaraz noski. Zure ekarpenak jasotzeko ilusio handiz gaude eta honekin batera zure parte-hartzea eskertu nahi dizugu.

Lanak gai hauetako bat jorratu behar du:

- Giza-zientziak eta Arteak: Historia, Hizkuntzalaritza, Filosofia, Arteak, Antropologia ...
- Gizarte-zientziak eta Zuzenbidea: Ekonomia, Enpresa, Zuzenbidea, Soziologia, Kazetaritza, Komunikazioa, Pedagogia, Psikologia ...
- Zientzia zehatzak eta Natur-zientziak: Fisika, Kimika, Geologia, Matematika, Biologia...
- Ingeniaritza eta Arkitektura: Industria-Ingeniaritza, Telekomunikazioak, Informatika, Arkitektura ...
- Osasun zientziak: Medikuntza, Erizaintza, Farmazia ...

Atarian aipatu bezala, Gazte ikertzaile kategorian sartuko dira bai doktorego tesia / doktore tesia bukatzeaz dauden horiek, bai tesia azken bost urteetan defendatu dutenak (gutxien-gutxienez artikuluen lehen egileak bete behar du baldintza hau).

Artikuluen bidalketa [easychair](https://www.easychair.com/) web-plataforma bidez egingo da.

ARTIKULUEN FORMATUA

Artikuluak euskaraz idatzita egongo dira. Jarraian adierazita dagoen egitura bete beharko dute, ebaluatuak izango badira:

- Izenburua eta egiletza
- Laburpena eta hitz gakoak (euskaraz eta ingelesez)
- Sarrera eta motibazioa
- Arloko egoera eta ikerketaren helburuak
- Ikerketaren muina

- Ondorioak
- Etorkizunerako planteatzen den norabidea
- Erreferentziak (eta, hala dagokionean, nazioarteko aipamena)

Artikuluak oinarrietan zehaztutako ereduari jarraituz eta pdf formatuan bidaliko dira, eta **sei eta zortzi orrialde artekoak** izango dira. Kongresuaren webgunean MSOffice, LibreOfficen eta Latex formatoetan oinarritutako txantiloak egongo dira eskuragarri. Artikuluak taulak eta irudiak baditu aparte bidali ahalko dira, .gif edo .jpg formatuan.

ARTIKULUEN ONARPENA

Batzorde Zientifikoak bidalitako lanen alorrez alorreko ebaluazioa burutuko du. Arlo bakoitzeko 10 bat lan aukeratuko dira ahozko aurkezpenetarako. Arlo bakoitzetik beste 10-15 bat lan aukeratuko dira poster moduan aurkezteko.

Berrikusketaren emaitza 2023ko martxoaren 20ko astean bidaliko zaio egileari eta, horrekin batera, poster bidezko aurkezpena edo ahozkoa egin behar duen adieraziko zaio.

Ebaluaziorako irizpideak:

- Gaiaren interes orokorra. Lanaren kalitatea eta irismena.
- Nazioartekotasun izaera duten lanak lehenetsiko dira. Nazioarteko argitalpen, egonaldi edo proiektu batekin lotuta egotea, esaterako.
- Ez dira lan espezifikoeziak izango. Kontuan hartu ez dela kongresu espezializatua. Helburu komunikatiboa gailenduko da. Ideien ulergarritasuna.
- Alor bakoitzeko aniztasuna bermatuko duen hautaketa egingo da.
- Euskararen zuzentasuna, ezinbestean oinarrizko zuzentasuna beharko du izan.
- Zuzentasun formala (formatua).

SARIAK

Jakintza arlo bakoitzean artikulu onenaren saria banatuko da. Beste sari batzuk ere aurreikusten dira.

DATA GARRANTZITSUAK

- Artikuluak bidaltzea: 2023ko otsailaren 17a
- Erantzunak: 2023ko martxoaren 20a
- Izen-ematea: 2023ko martxoak 27tik maiatzaren 7ra
- Artikuluen azken bertsioa: 2023ko martxoaren 30rako
- Kongresua: 2023ko maiatzaren 17tik 19ra.

IZEN-EMATEAK

Lana aurkeztuko duen egileak ikergaztea izan beharko du eta izena eman beharko du (erregistratuta edo matrikulatuta egon beharko du). Kontuan hartu artikulua bidaltzeak ez dakarrela automatikoki erregistratua egotea. Izen(a) ematea ezinbestekoa da, eta honetarako matrikula ordaindu behar da.

HARREMANETARAKO

ikergazte@ueu.eus